

REGIONAL NEWS BULLETIN

HEADLINES (MORNING)

- 1. Chief Minister Pu Lalduhoma leh Mizoram tlawha lo zin mek Union Minister of State Pi Nimuben Jayantibhai Bambhaniya chuan Mizoram tana buhfai chawk luhna tam zawk leh awlsam neih theih dan tur chungchang an sawi dun.
- 2. Union Minister of State Pi Nimuben Jayantibhai Bambhaniya chuan Sawrkar laipuiin chhung tin intodelh a ngai pawimawh tih sawiin Mizoram mipuiten eikhawp hnianghnar an neih reng theih nan theihtawp an chhuah dawn tih a sawi.
- 3. India leh Sweden chuan an thawhdunna neih mek chu ti sangin Strategic Partnership-a hlankai an remti.
- 4. Vawiinah Keralam sawkar thar Congress hruaitu V D Satheesan-a kaihhruai chu lakluh a ni dawn.



CM & UNION MoS

Chief Minister Pu Lalduhoma leh Mizoram tlawha lo zin mek Union Minister of State Pi Nimuben Jayantibhai Bambhaniya chuan Mizoram tana buhfai chawk luhna tam zawk leh awlsam neih theih dan tur chungchang an sawi dun.

Nimina Chief Minister Bangla-a inkawmna ah hian Chief Minister chuan Union Minister of State Pi Nimuben Jayantibhai Bambhaniya Mizoram tlawha arawn zin avangin lawmthu a hrilh a, Open Market Sales Scheme (OMSS) hnuai buhfai tam zawk lei phalsak chungchang leh OMSS atanga lei a rem loh pawha Bharat Rice atanga lei phalsak bakah NFSA Mizoram rice allocation Quota tihpun chungchang leh Central sector scheme awm thin, 'Storage & Godown' tihnun thar chungchang an sawi dun a, Union Minister hian Chief Minister thusawite chu a lo bawhzui tur thu a sawi a. Mizoram chu mawi a tih thu leh nuam a tih thu Chief Minister hnenah hian a sawi bawk.

(Desk)



MUHCS 2.0

Mizoram Universal Health Care Scheme (MUHCS) 2.0 atana inziah luh hun tawp ni thleng khan online hmangin chungkaw 46,228 inziaklut an awm a, nikum aiin inziaklut hi a let chuangin an tam zawk.

Ziah luh chin MUHCS 2.0 hmang thei hi a mihringah chuan mi nuai 2, sing 1, sang 9 leh 353 an ni a. Tangka kum kal ta (2025-2026) chhunga MUHCS 1.0 kalpui-ah khan kum tuan inziak lut hi chhungkaw 20,213 an ni a, nikum nena khaikhinin kumina inziak lut hi 26,015 in an tam zawk a ni. Hriat theih chinah MUHCS hi mi nuai 12 velin an hmang thei dawn nia ngaih a ni a, offline-a inziak lut leh Pensioner inziak lut zat hi la hriat theih loh ni mah se, chhut danin Online-a inziak lut mi nuai 2, sing 1, sang 9 leh 353 te, AB PM-JAY atanga MUHCS zawm mi nuai 5, sing 9, sang 9 leh 433 te, sawrkar hnathawkte leh offline leh pensioner te nen mi nuai 12 velin MUHCS hi an hmang dawn niin ngaih a ni.

MUHCS 1.0 ah kha damlo inenkawl senso bill pek theih loh a awm lo a, bill an pe tha a ngaih a ni a, MUHCS zawmtu mimal enkawl damdawiin te pawhin an thatpui niin hriat a ni.

(Desk)



DRUG HAUL

Mizoram Police chuan tun hnai khan hmun hnihah cheng vaibelchhe 10 leh nuai 60 hu ruihhlo an man.

IGP (Headquarters) leh Mizoram Police department Chief Public Relation Officer Pu H. Ramthlengliana'n a sawi danin kar kalta Nilaini khan, SDPO (Vairengte) kaihhruai Vairengte Police special team-te chuan N. Chhimluang-ah Ashok Leyland truck pakhat Assam registratrion chu an lo tiding a. Lirthei dangte endik hna an thawh mawlh mawlh laiin, he truck driver leh amah puitu te chu an tlan chhe thut a, umzui mah se, man hman an ni ta lo a ni. Mechanic ruaiin he lirthei hi uluk taka endik a nih hnuah, gear lever bula thil thuhrukna tura bik siam kua (cavities) hmun hnih atangin, heroin gram 900.29 a rit, a hlutna cheng vaibelchhe1 leh nuai 80 hu an hmuchhuak a. He truck leh a khalhtute phone an tlan chhiatsan mobile phone pahnihte pawh chu lak nghal a ni a, Vairengte Police Station-ah ND&PS Act, 1985 section 21(c)/25 hmanga thubuai ziah luh a ni.

Thawhtanni zan dar 8:00 vel khan, rinhlelh thil thu-ah Champhai Police-te chuan Champhai Police Check Gate-ah Sumo pakhat chu an tiding a. He lirthei Zokhawthar atanga Aizawl pan hian passengermi pakhatmah phurh a nei lova, a khalhtu Zardawngkima (36) Tuidil khua, Myanmar tuna Khawmawi, Myanmar-a cheng mek nia inchhal chu an man. Hriatpuitu rinawm tak awm laiin uluk taka lirthei hi dapin, bean ip chhunga thuhruk, heroin gram 75 a rit leh theihai dahna bawm chhung atangin methamphetamine kg 10 leh gram 818 a rit an hmuchhuak bawk a. Methamphetamine hi tualchhung rate-in cheng vaibelchhe 8, nuai 65, sing 4 leh sang 4 hu a chhut a ni. Hemi chungchangah hian Champhai Police Station-ah thubuai ziah luh nghal a ni a, ND&PS Act, 1985 section 22(c)/21(b)/25 bakah The Immigration & Foreigners Act 2025 section 21 hmanga thubuai siamsak a ni.

(Desk)

<><><>

UNION MoS

Union Minister of State Pi Nimuben Jayantibhai Bambhaniya chuan Sawrkar laipuiin chhung tin intodelh a ngai pawimawh tih sawiin Mizoram mipuiten eikhawp hnianghnar an neih reng theih nan theihtawp an chhuah dawn tih a sawi.

Mizoram tlawha lo zin mek Union Minister pual hian nizan khan Food, Civil Supplies & Consumer Affairs Department chuan Aijal Club-ah Inkawmhona leh Zanriah an buatsaih a. Pi Nimuben Jayantibhai Bambhaniya chuan Mizoram in GI tag nei tawh Mizo Sawhthing leh Mizo Hmarcha mai bakah khawvel hriat khawpa hmingthang engemaw zat a neih thu a sawi a; Mizoram in harsatna a neihte zira, a tul anga chingfel tura zin anih thu a sawi.

Pi Nimuben chuan sawrkar in chhung tin intodelh a ngai pawimawh tih sawiin hmarchhak bialah fur ruahtui a tlak nasat avangin Ration pek lawk annih theih nana tanpui a inhuam thu a sawi a, mi tinin eikhawp hnianghnar tak an dawn theih nan sawrkarin theihtawp a chhuah tih a sawi.

Nizana inkawmna ah hian Mizoram sawrkar FCS&CA changtu Minister Pu B. Lalehhanzova bakah sawrkar mi pawimawh hrang hrang ten thu an sawi a ni.

(Desk)

<><><>

STATE UNIVERSITY

Higher & Technical Minister Dr. Vanlalhlana chuan Mizoram State University din turin sorkar a inpeih thawkhat tih a sawi.

Minister leh YMA Sub Hqrs Lunglei hrutute chuan niman khan Mizoram state University hmun tura ruahman pakhat Melte, Serkawn ram ami chu an tlawh a. Dr. Vanlalhlana chuan, sawrkar chu a inpeih thawkhat tawh tih sawiin, official lamin hmalakna an kal pui mek thu leh a hmunhma tur thlanfel theih turin, Lunglei lam atang hmalakna chak zawk angaih thu a sawi a, tihfel ngaite tihfel a nih chuan hna tan mai theih anih thu a sawi bawk.

H&TE Minister Dr. Vanlalhlanna chuan Lunglei leh a chheh velah University din theihna hmun tur duh thlan tur awm nual se a that thu sawiin, sum tam tham senna tur a nih avangin leh zirna inhlun leh pawimawh tak tur a nih avangin a hmun tur pawh uluk zual zawk a dap kual angaih thu leh chumi hnuah thulukna uluk taka siam a tul thu asawi a, a hmun tlan chungchangah pawh HPC-Vice Chairman hovin MLA, LMC Councillor -te bakah NGO- awmte pawh inrawn tlan chu suala a hriat loh thu a sawi bawk a ni.

<><><>

DENGUE

Kumin chhungin Mizoramah Dengue natna hri kai mi 132 hmuhchhuah tawh an ni a, nunna chan an awm lo.

Inrinni khan Health & Family Welfare, National Health Mission hnuai National Vector Borne Disease Control Programme (NVBDCP) chuan ram pum huap “National Dengue Day” (Dengue Dona Ni) an hmang a. He mi huna an tarlan dan chuan Mizoramah kumin January leh April inkar chhung khan Dengue natna vei rinhlelh mi 2,055 endik zingah he natna vei hmuhchhuah hi mi 132 an awm a, nunna chan an awm lo. Nikum 2025 chhung khan Dengue natna vei mi 1,482 hmuhchhuah an ni a, nunna chan an awm lo bawk a ni. Dengue dona ni pual bik hi Mizoram a District hrang hrangah te pawh hman niin, TV, Chanchinbu lamahte mipui zirtirna tihchhuah a nih bakah sikul, Kohhran, Khawtlang leh pawl hranghrangte nen hlawkthlak taka hun hmanho a ni bawk niin NVBDCP thuchhuah chuan a tarlang.

Dengue natna hi Mizoramah mi 8-in an thihpui tawh a. Kum 2022 khan mi 5-in an thihpui a, kum 2023 khan mi 2 leh kum 2024 khan mi 1 in a thihpui a ni. Kumina Dengue natna vei hmuhchhuah tawh zat 132 zinga 100 zet hi Aizawl district a cheng an ni a, Lunglei district ami 25 an awm ve bawk. Kum tin hian Aizawl district-ah Dengue a hluar ber ziah a, Lunglei district-in a dawt thin a. Nunna chan phahte hi Aizawl district ami vek an la ni.

(Desk)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

COVID-19

Kumin chhungin Mizoramah Covid hri kai mi 90 an awm tawh.

Covid-19 hri leng a kiang tawha ngaih hnu-ah kumin chhung hian Mizoramah he hri kai hi mi 90 hmuhchhuah an ni leh tawh a. May thla chhung hi hri kai hmuhchhuah thar tam ber thla niin mi 52 hmuhchhuah a ni a. May ni 6-ah ringawt khan Covid-19 hri kai a rinhlelh mi 22 endik zingah hri kai 18 hmuhchhuah a ni. Zirtawpni leh Inrinni inkar chhung khan hri kai enkawl mek mi 10 chu enkawl dam an ni a. Tunah hian hri kai enkawl mi 4 an la awm mek a ni.

Kum 2020 tir lama Mizorama Covid-19 hri kai hmuhchhuah a nih hma hret tanga tun thleng hian hri kai leh kai lo mi nuai 19, sing 9, sang 8 leh 592 endik an ni tawh a, an zinga mi nuai 2, sing 3, sang 9 leh 771 te chuan hri an kai tih hmuhchhuah a ni a. Mi nuai 2, sing 3, sang 9 leh 33 te chu an dam chhuak a, mi 734-in an thihphah a ni.

(Desk)

<><><>

PRISONERS

Mizorama tanin (Jail) hrang hrangah mi 1779 an tang mek a, tang thei zat biktuk aiin mi 517 in an tam zawk.

Mizoram sorkar Prison Department-in an tarlan danin Central Jail, Aizawlah tang mi 853 awmin tang an tam ber a, tang 204 awmna Champhai District Jail chu pahnihna an ni.

Tang mek zingah hian Central Jail a tang zinga mi 49 te chu damchhung tang tura hrem lai an ni a, anni bakah hian Lawngtlai District Jail-ah damchhung tang tur mi pakhat a awm baw - Jail dangah chuan damchhung tang tur hi an awm lo.

Central Jail-a tang mekte hi mipa vek an ni a. Central Women's Jail, Aizawlah hmeichhia 106 tang mekin, district dangte nen Mizoramah hmeichhia Jail tang mi 168 an awm mek a ni.

Tun hnai khan Central Jail-ah hian Legal Aid Help Desk hawn a ni a. Legal Aid Help Desk atan hian Jail tang kantu, an chhungte'n dan lam an hriat duh te, an chhungte case chungchang thil te an zawt thei dawn a ni.

<><><>

PM MODI

India leh Sweden chuan an thawhdunna neih mek chu ti sangin Strategic Partnership-a hlankai an remti. Nimin khan Prime Minister Narendra Modia leh Swedish PM Ulf Kristersson te chu ram pahnih inkar chungchang sawidunin an inkawm a. Pu Modia chuan Jammu & Kashmir-a Pahalgam-a firfiakte beihna chungchanga Sweden-in India a thlawpnaah lawmthu a sawi a. Ram pahnihten firfiakte leh anmahni puitute lakah beihpui an thlak chhunzawm zel dawn tih a sawi baw a ni. Prime Minister Modia leh Kristersson te hian thuchhuah intawm siamin India leh Sweden te chuan ram venhimna lamah an thawhdunna an chhunzawm zel dawn tih an sawi baw a. Defence sector ah hian hun rei tak daih tur thawhdunna an ruahman mek an ti bawk.

PM Modia hian wawiinah Norway a pan lehngal dawn a. 3rd India-Nordic Summit ah a tel dawn a. India leh Norway inkara thawhdunna hrang hrang Norway ram hruaitute nen an sawiho ang.

(Newsonair)

<><><>

KERALAM NEW GOVT.

Wawiinah Keralam sawkar thar Congress hruaitu V D Satheesan-a kaihhruai chu lakluh a ni dawn. Thiruvananthapuram ah sawrkar thar lakluhna hun hi hman a ni dawn a. Congress party chuan tun thla ni 14 khan Satheesan hi Keralam Chief Minister atan an lo puang tawh a. Assembly inthlan neih zawh takah khan Congress kaihhruai United Democratic Front chuan Assembly seat hmun thuma thena hmun hnih aia tam an la a ni. Vawiina Chief minister lakluh anih rual hian Minister dang 20 lakluh tel an ni dawn a ni.

(Newsonair)

<><><>